

南宮奏議

南宮奏議卷第十八目錄

宗藩一

題各王府襲替等項事宜

叅治越關奏進丹書

郡王出居別境查議停寢

親王請勅禁諭宗室

親王襲封後出郭祭掃

叅治奏本失格

建安王奏瀆事情乞加戒飭

弋陽王奏以審理輔導乞加戒飭

叅治周府將軍安溜等擁衆凌逼撫臣

叅治周府儀賓等聚衆擁入藩司

代府樂昌王改遷府第覆議

乞恩推封養母查無事例

交城王長孫表相比例請封事情

南宮奏議卷第十八

鈴山堂集五十八

宗藩一

題各王府襲替等項事宜

臣等看議得各王府宗室襲替及奏請名選婚儀賓等項查得見行事例親郡王病故其子應襲者例該各王府具奏本部行宗人府查對玉牒倫序生年月日明白即與題請行造冊服等件俟年歲已足服滿之日遣官冊封及親王子女郡王嫡長子長孫俱年五歲請名一十五歲請封選婚俱該各王府具奏本部行宗人府查對明白方與題請應選婚者類行該

布政司於本地方選配保送該府仍行具奏備查無碍即與照例題請冊封爲妃并授封夫人等項儀賓請授本等職事賜給冠帶引奏回還成婚其冊服賜名封號誥命祿米房室從人等項俱行各該衙門奏請定奪俱有定規遵行已久但中間多有不由親郡王類奏驀越具陳及不應承襲妄引事例奏請及一應例外陳乞者本部俱照例查叅立案其有行宗人府查對玉牒年歲差訛及查無奏報或年歲未及輒自奏請名封或倫序不明具奏爭襲或不候奏請擅自成婚及選婚不係本土人氏或一應題請事情不

行備開年月朦朧具奏於例有碍者例應駁行經該撫按官及布政司轉行長史等官查勘明白方與題請但本部行文駁查有司承勘動經歲月不無延滯之弊臣等理合題請合候命下本部類行各布政司轉行各該長史教授具啓各王府親郡王并管理府事將軍知會今後凡各王府新生子女務要依期奏報玉牒冊內備開的確年歲月日不致遺漏差訛若年歲未及輒行具奏倫序不明妄奏爭襲及不候奏請擅自成婚與不係本土人氏及一應題請不行備開年月者俱不許朦朧具奏如再故違本部查出將

經該官吏并輔導等官通行查叅究治其有不係類
奏驀越具陳與不該承襲妄引奏擾及一應例外陳
乞有關大法者俱聽該科及本部明白叅駁將該府
輔導等官查叅從重究治若奏請名封襲替冠婚儀
賓等項查無違碍經該官吏不與題請者查出一體
究問處治庶人心知警而弊源可革矣嘉靖十七年
四月初二日奉

聖旨准議

叅治越關奏進丹書

看得周府鄢陵王府鎮國將軍安瀕奏稱乞要選擇

名山建立壇室修煉成丹越關進獻丹書期欲補報
一節叅照鎮國將軍安瀕本以宗支享有祿位自合
恪遵 祖訓以奉藩封經史名教自有樂地却乃猥
習異術妄信陳言以不可考信之事無所證驗之書
干瀆 聖覽至欲擇地開壇具材候火尤爲乖謬所
據進到丹書應合給與領回況明知驀越關津禁例
事屬故違其本府輔導等官并沿途關隘守把官員
失於覺察俱應叅治合候命下移咨都察院轉行各
該撫按衙門照例查提問擬如律其鎮國將軍安瀕
見住會同館原其以獻愚忠永 聖壽爲言非有別

南宮奏請 卷六 三 金
項情由伏望 聖恩免其罰治仍咨吏部取辦事官
一員伴送回還惟復別有定奪伏乞聖裁嘉靖十八
年十二月二十八日奉

聖旨是

郡王出居別境查議停寢

看得衡王奏稱第四弟高唐王厚煥第五弟齊東王
厚炳俱各授封成婚年久先該父王存日比照德府
泰安王事例具奏乞行有司照例蓋造府第已蒙該
部行山東布政司查勘相應蓋造因本布政司掌印
官遷轉不常一向未經復奏見今尚無府第棲身甚

爲不便乞要將沂州先涇王廢第賜給二弟棲止一
節爲照初封郡王其蓋造府第料價例該工部行令
司府查勘會計明白於本境內起蓋今查高唐齊東
二王先年授封已經工部將該造府第行令山東布
政司查勘議處去後但今年久尚未回報所以衡王
又行具奏要將沂州先涇王廢第改爲高唐齊東二
王居住臣等看得郡王應該統於親王同居一城庶
有約束今衡府國於青州而沂州地方相離寫遠本
部查無初封郡王出居別境事例道路隔別事體不
便恐後相援爲例以致紛擾地方所據衡王奏乞改

遷事屬違碍臣等擅難再議合候命下本部移咨工部查照高唐齊東二王先年原行蓋造府第緣由行令山東布政司上緊查議復奏前來以憑該部覆請定奪嘉靖二十年九月初二日奉

聖旨初封郡王無出居別境事例只照先年原行蓋造

請 勅禁諭宗室

臣等看得周王奏稱本府宗室儀賓三千餘多其間暴橫無忌爲惡不悛者不少恐日滋月盛爲害地方乞要降勅曉諭禁治一節爲照郡王將軍中尉等近

年以來往往不守禮法故違訓制赴闕瀆奏人相效
尤雖經 明旨禁諭率多怙終罔悛今周王以襲爵
之初而能明法謹度請勅禁治本部查有請勅鈐東
事例相應題請合候命下本部行移翰林院請勅一
道給賜周王朝綱鈐東闔府宗室併儀賓人等各令
改過遷善安分守法不許仍前爲惡不悛如有抗違
不服者聽王指名具奏前來照例叅奏處治嘉靖二
十年四月二十三日奉
聖旨是准與王勅

親王襲封後出郭祭掃

查得親王襲封後例許出城祭掃一次今周王朝岡
奏稱賜襲祖爵乞要親詣祖墳祭掃一節看得周府
王墳原在祥符者係附郭鄭州者相去百里故先年
親王以下襲封後得照例祭掃其後周恭等王葬鈞
州則去省城四百里今周王朝岡欲出祥符達鄭州
以至於鈞州往回動經旬日況今禾黍布野車從蹂
踐不無擾民似宜酌處合無待秋成之後照例准令
赴鄭州祖墳祭掃一次祭畢即回餘聽本府差官致
祭亦足以盡王孝思之誠矣嘉靖二十一年五月初
七日奉

聖旨是

叅治奏本失格

查得鄭王奏本四本本內稱弟俱不稱臣又不稱
聖號俱稱 皇兄字樣又進到表文二通俱各稱弟
鄭王厚烷不行稱臣俱稱 皇兄陛下不稱 聖號
臣等竊惟君臣之分同於天地 國家定制宗室懿
親雖係伯叔尊行亦必虔恭寅畏稽首稱臣執禮惟
謹所以嚴大分遏僭踰等陞森然毫髮不可違越者
也今叅看得鄭王奏進慶賀謝恩四疏及進賀表文
乃輒用家人之禮俱各稱弟不行稱臣及俱稱 皇

兄不稱 聖號是徒知親愛之私情罔識君臣之大
分顯是該府長史等官不諳典制有失輔導以致王
於有過之地事屬有違法當查究合候命下移咨都
察院轉行巡按河南監察御史將該府輔導等官提
問如律仍行長史司啓王知會及通行天下各王府
今後奏進章疏表文務要恪循典制不許妄意稱謂
有乖禮法庶恩義並舉 皇度惟貞而宗室各知所
警矣嘉靖十六年九月二十日奉

聖旨卿等說的是該府長史等官本當都查提問罪
且饒這遭各罰俸三箇月便通行天下王府一體遵

守

建安王奏瀆事情乞加戒飭

看得建安王覲鍊奏稱弋陽王拱橫以旁支郡王賄
理府事今要主祭社稷乞行切責一節爲照王府一
應奏請俱本部查照舊規題覆其應立案應叅奏者
亦皆再三酌議必求事理克當昨該弋陽王拱橫奏
要主祭山川社稷本部查無事例已經立案外今建
安王覲鍊妄指前因其奏內情詞明指拱橫不應管
理府事務欲洩其忿恚以此大肆煩言上瀆天聽且
拱橫管理府事先年本部題奉 欽依不以親疎倫

序爲言以宸濠前後有無相干行勘意以倫序近則相干之迹著屬籍遠則相干之勢踈節經江西鎮巡等衙門會勘本部會同五府九卿等官議得建安王樂安王前後相干各相指擿雖蒙曠蕩之恩終有嫌疑之迹弋陽王拱橫素行在人別無訾議及與宸濠前後無干題奉 聖旨着管理府事今經一十六年成命有歸宗親所服覲鍊何乃復有此議若不戒飭將來釁端無已伏望 皇上將覲鍊拱橫 天語嚴加戒飭各宜安靜毋得輕信撥置妄生事端致傷國體再照王府奏事人役潛住京師內外探聽事機不

由王意輒用空印黃本自寫封進因此奏牘日繁委
爲積弊雖經本部具題禁革日久人心玩肆罔知懲
戒伏乞特勅緝事衙門嚴加緝訪如有此等人役潛
住京城即時拏送法司從重問擬則奸人畏法而宗
室爭競之風可息矣嘉靖十七年二月十四日奉
聖旨你每說的是拱攢管理府事已有成命主祭原
未准行覲鍊如何累次妄奏大肆煩言本當查究且
饒這遭其餘依擬

弋陽王奏以審理輔導乞加戒飭

看得管理府事弋陽王奏稱本府凡有上下文移一

應政務俱係教授掌行近蒙賜審理谷達前來與臣
輔導乞要將本府一應政務行令本官掌管一節臣
等爲照王府設官各有職守親王府設有審理職專
問理刑名郡王府止設教授職專輔導此 祖宗成
法正名定分萬世守之不容一毫踰越僭竊者也叅
照弋陽王雖係管理府事實本郡王之爵據奏添有
審理是郡王府而有親王之官已爲非分之得矣今
又奏乞以審理爲輔導是又以理刑名而紊輔導之
任却將額設教授奪其職守恣意紛更瀆奏將來隴
蜀之望又不知其如何也所據弋陽王拱攢伏乞

皇上天語嚴加戒飭今後雅宜安靜守分恪遵成憲
無得仍前妄議奏擾自取愆咎其審理谷達顯有設
謀撥置欲要收攬事權情由其教授官不行規止顯
是庸懦無爲不堪輔導以致王有此奏合候命下本
部咨行都察院轉行巡按江西監察御史將谷達并
該府教授官查提究問發落以儆將來臣等事關典
制不敢不上聞舉正伏乞 聖明裁奪嘉靖二十二
年二月十五日奉

聖旨是拱橫屢有奏擾不務安靜着今後恪遵典章
保守祿位毋得聽信撥置自取愆咎谷達等提了問

附錄卷之二
參治周府將軍安溜等擁衆凌逼撫臣

看得巡撫河南右僉都御史魏有本題稱本年十一月十五日節該周府永寧汝陽鎮平鄆陵遂平內鄉等府鎮輔奉國中尉安溜睦樸等二百餘位擁聚布政司攔截逼要加添祿銀不從又約五百餘位擁入本院攘鬧逼令批司取劄方散有傷政體乞要申勅周王將安溜等嚴加切責戒諭一節爲照王府宗室一切應行事務例該長史教授文移轉達所司衙門酌處而行參照安溜等位列宗藩不知自重故違勅戒聚衆擁入巡撫衙門大肆喧攘凌逼風憲大臣

又至藩司辱置官僚迫脅行事若不嚴加戒飭恐漸不可長將來官司何以展布為此亂階誠亦非宗藩之利所據安溜等既經巡撫都御史魏有本叅奏前來相應議處安溜睦樸係首倡聚衆攘亂恭請 皇上乾斷嚴行罰治其餘五百餘位合候命下本部移咨都察院轉行河南布政司備行該府長史司具啓周王知會通行嚴加切責今後務要定分守法如有應行事情照例具啓移文轉達不許擅自聚衆輕詣所司瀆亂如再不悛一體指名叅治及照安溜睦樸該府教授不能以理勸阻亦合有罪仍行巡按御史

提問如律照例發落嘉靖二十一年正月二十四日奉

聖旨宗室擁衆凌逼撫臣所司好生不守朝廷法度本當通行究治但罪重首倡安溜着革爲庶人其餘依擬行該府遵照勅旨嚴加約束各府教授都提了問

叅治周府儀賓等聚衆擁入藩司

看得河南巡撫都御史魏有本題稱儀賓牛振羅江等憑恃宗婚輕蔑藩省主率郡縣主君喧攘司堂公座事出異常比之將軍安溜睦標等情罪尤重欲乞

將首倡儀賓牛振羅江重加懲治及周府承奉李進
陳阮斬用長史劉元嗣依違坐視亦乞切責各一節
叅照儀賓牛振羅江等主率郡縣主君混入藩司攘
亂止知憑天潢之勢可以凌辱所司不思犯踰闕之
嫌至於卑褻宗室故違勅戒重傷國體據法通合叅
究其牛振羅江倡率爲首情罪尤重及照長史劉元
嗣職專輔導并承奉李進陳阮斬用各明知郡縣主
君不合擅出宮閫不行啓王禁止罪實難辭既該都
御史魏有本叅奏前來相應究治合候命下本部移
咨都察院轉行河南巡按監察御史將儀賓牛振羅

江等及長史劉元嗣各行提到官從重問擬照例奏請發落其承奉李進陳阮斬用及郡縣主君本部仍行河南布政司備行該府長史司具啓周王知會將李進等嚴加切責郡縣主君各加戒飭以後不許再肆輕出以瀆國典如更不悛聽周王指名叅奏前來以憑題請重加處治嘉靖二十一年五月初九日奉聖旨是

代府樂昌王改遷府第覆議

該禮科都給事中丁湛等題奉 聖旨這所言禮部看了來說欽此查得嘉靖十七年正月內該巡撫大

同地方右副都御史史道題為遵例懇乞天恩願分
封域以便安養事內開大同邊鎮本在遐荒近年以
來宗室生育繁衍城中填塞日不可容今樂昌王令
教授呈乞要比照山陰等王隨府改遷願將大同府
第變易自力營修官室備辦脚力不敢勞民合無准
令照例改遷別城其餘宗室有情願者一體准改等
因奉 聖旨該部知道欽此本部見得事體重大難
以施行已經立案外本年六月內又該樂昌王奏為
比例懇乞天恩憫念宗室繁衍俯從改遷地方以便
居處事乞要遷移蔚州地方相去大同二百餘里道

路既不遑遠人情又甚相宜等因奉 聖旨禮部知道欽此又經本部立案外本年八月內又該代王奏前事內稱樂昌王改遷蔚州俱有未便其餘山西大州既無分封又多空閑相應俯從改遷居處等因奉 聖旨該部知道欽此彼時本部看得事干宗室既該都御史親王前後題奏前來改遷恐非得已且其自營府第不敢勞民衆心亦或安便及查得天順四年四月內節該欽奉勅山西布政司按察司代府郡王數多城中窄隘况今祿米等項百姓運送艱難欲於腹裏蒲州澤州各造府第二處以遷王居以便民

力欽此天順五年二月內又節該欽奉 英宗皇帝
致書代王將大同城內山陰王襄垣王遷居蒲州隰
川王遷居澤州俱欽此欽遵外有此前例以故本部
查照題奉 欽依行令彼處巡按官及該府長史教
授啓王知會從公查勘樂昌王是否與山陰等王相
同其本宗位下見今宗室儀賓人等員位若干是否
繁衍難居於地方恐有疑貳其事情俱在彼中通行
詳處停當會奏前來以憑題請臣等蓋以彼處撫按
等官事在目擊則查處必盡其詳而身有地方之責
果於事體未便則勘報不敢有隱也至嘉靖十八年

五月內該右副都御史史道題稱會同巡按監察御史皮東山并山西布按二司守巡等官查勘得樂昌王奏要改遷委與山陰等王事體相同其本宗室儀賓共有二十九位員子女數多城中窄狹難以居住及勘得代州於天順年間設有廣靈潞城二王府第基址猶存可以改遷及稱樂昌王居代不嫌於始封名號之同該爵常祿未加不病於粳米所出之地大同宗室祿糧粳米俱係山西槩派出辦不獨蔚代二州又勘蔚代二州准令一處安置於地方俱無妨礙等因奉 聖旨該部知道欽此欽遵該本部據其勘

覆具題上請奉 聖旨代州係代王始封爵邑准遷朔州今後不許相援爲例以致紛擾地方欽此欽遵備行翰林院請勅准令遷改外今該前因通查案呈到部看得禮科都給事中丁湛等題稱前事乞要收回成命勿准改遷一節具見該科慮終謹始至意相應依擬合候 命下本部行令彼處撫按等官將樂昌王停止改遷以後不許奏擾嘉靖十八年閏七月初八日奉

聖旨是准今議行

乞恩推封養母查無事例

該徽王厚燭奏奉 聖旨禮部看了來說欽此欽遵
抄出送司查得洪武二十五年閏十二月內該本部
同翰林院等官奉欽依議得王妃以下有所出者稱
夫人永爲定例奏奉 太祖高皇帝聖旨是欽此又
查嘉靖十八年二月內 恩詔內開各王府親郡王
嫡母與生母並存者詔書到日其嫡母准加稱太妃
生母准授封次妃又查得先該徽王厚燭節次具奏
乞要將妾媵趙氏請封次妃已經禮科具叅本部立
案外今又具奏前因通查案呈到部看得徽王奏稱
庶長子伍城王載堉嫡母妃張氏薨逝生母齊氏早

亡與養母趙氏撫育今遇恩詔已將生母具奏追封
外乞要將養母趙氏賜封次妃一節爲照王妃以下
有所出者稱爲夫人係累朝遵行定制郡王生母
封授次妃乃近年崇異特恩蓋重其所生母以子貴
之義今徽王宮妾趙氏原無所出十八年恩詔止
准生母授封亦未及於養母今伍城王生母齊氏已
經追封復欲推恩養母趙氏情雖可原而分則有限
其奏稱養母之服同於生母係律令所載制服之義
本以緣情若本部於宗室請乞之文止應守例誠恐
將來比例一槩陳乞無有紀極臣等不敢擅擬嘉靖

十九年六月十三日奉

聖旨養母原無受封之例但王父子情詞懇惻必其恩義深篤特允所請後不許比例陳乞

交城王長孫表相比例請封事情

該交城莊僖王長孫管理府事輔國將軍表相比奏奉聖旨禮部知道抄出送司查得弘治十年五月內該秦王奏據保安莊簡王妃陳氏啓稱有子保安榮穆王誠潢病故無子夫莊簡王庶第三子鎮國將軍誠淶乃榮穆王之弟乞要比例承襲該本部看得保安榮穆王既無嫡庶兒男合無照例將誠淶襲封爲

保安王以承繼伊父莊簡王之爵等因覆題奉 孝
宗皇帝聖旨是欽此又查得本部見行事例郡王病
故無嗣者其宗支止許以本等官職奉祀管理府事
又查得正德七年閏五月該巡按山西監察御史周
奎題稱交城榮端王表杅正德六年二月初五日薨
逝絕嗣查得本府鎮國將軍奇伊係表杅親支相應
管理府事等因該本部看得交城王表杅病故絕嗣
伊叔奇伊既該巡按御史奏報應合照例請 勅一
道止以本等官職管理府事等因覆題奉 武宗皇
帝聖旨是欽此又查嘉靖十六年十月內該鎮國將

軍奇渚內助孔氏奏稱臣夫奇渚於嘉靖十六年三月十八日病故乞要將庶長子輔國將軍表柙承繼伊父管理府事該本部照例覆題奉聖旨表柙著以本等官職奉勅管理府事欽此欽遵外今該前因案呈到部看得交城莊僖王長孫管理府事輔國將軍表柙奏稱伊祖莊僖王次子榮惠王奇昌薨逝之嗣第三子奇瀟先故奇瀟子榮端王表柙承襲伯爵後表柙亦薨逝之嗣臣父鎮國將軍奇渚係莊僖王第六子未襲病故臣係莊僖王親孫乞要比照保安王誠渌等事例承襲祖爵一節爲照交城榮端王表

杻於正德六年二月初五日病故絕嗣其親叔鎮國將軍奇泚彼時照依郡王病故絕嗣事例止以本職管理府事後奇泚於嘉靖十六年三月十八日病故伊子輔國將軍表相亦照例以本職奉勅管理府事外今乃比照保安王誠潢病故絕嗣伊弟誠淥等襲封事例奏乞承襲祖爵雖查與弘治十年保安王誠淥襲封事例相同但係襲封重典臣等不敢輕擬伏乞 聖裁嘉靖二十年三月十三日奉 聖旨你部裏既查有事列表相准承襲祖爵

南宮奏議卷第十八

南宮奏議卷第十九目錄

宗藩二

宗室不遵 明旨駕覘虛情傾陷大臣乞賜究
治以正國法

襄垣王第五子仕坏襲封緣由

查勘襄府代理府事事情

覆勘襄府管理府事事情

韓府隴西王違例請繼

荆府永新王子女請封事情

秦府永壽王下爭襲事情具題行勘

永壽襲封事情勘報覆題

南宮奏議卷第十九

鈴山堂集五十九

宗藩二

宗室不遵 明旨駕親虛情傾陷大臣乞賜究
治以正國法

嘉靖十八年十一月該魯府鄒平王長孫觀熾奏請
襲封及輔國將軍健柯亦奏爭襲等因該本部備查
節年會勘過案卷見得觀熾應該承襲祖爵健柯累
次爭襲奏擾已經嘉靖十年 降勅戒諭今又聽人
撥置執迷不悛請乞戒飭等因嘉靖十八年十一月
二十六日具題奉 聖旨是健柯不許仍前奏擾欽

此欽遵外不意健柯又令伊男觀炘出名規詞奏擾
於今年二月初七日暮聞都察院門首貼有觀炘奏
詞一道至十二日於刑科抄出觀炘爲父健柯具奏
事與所貼詞語相同內開觀炘不該承襲王爵伊祖
母丁氏原封繼妃已經削奪要得復還封號重給金
冊明圖爭襲又稱觀炘差人向伊抱本人王朝卿說
稱夏閣老已受俺銀五千兩嚴尚書二千兩劉郎中
一千五百兩王該俺襲又稱前都察院僉都今戶部
侍郎王杲是汶上縣徐尚忠親家徐尚忠是觀炘岳
父你若再奏就死都察院等語臣聞此不勝驚異切

惟觀熾承襲緣由本部都察院前後卷案明白可查
豈有倫序不明臣等輒敢在法違例冒昧請封之理
只是徧柯因爭未遂恨臣入骨見臣近遭浮論乘機
附和駕捩虛詞搖惑衆聽意圖翻異成案以遂爭奪
之計其爲牽扯誣罔情狀甚著皇上日月之明白
能洞察但臣若不辯明恐無以白于群情將謂臣實
徇私不得不詳言之緣本部覆查得鄒平恭懿王陽
鏞存日妃張氏於成化五年病故無出成化六年妾
周氏庶生長子當渙即觀熾之祖也成化九年選丁
氏爲內助庶生次子當京即徧柯之父也彼時陽鏞

溺於私愛將當涼朦朧請封長子又將丁氏朦朧請封繼妃陽鏞於正德四年薨逝該魯王陽鑄奏爲乞明襲封王爵事該本部會同皇親公侯駙馬伯府部等衙門議得郡王妃病故無後者許選繼室不拘嫡庶但有所出者止爲內助不授繼妃之封內助若有所生亦止爲庶子不得稱嫡承襲此累朝定制今鄒平恭懿王妃張氏病故未久妾周氏即生當湏是有庶長子矣後雖奏選丁氏止爲內助而不當授繼妃之封丁氏雖續生當涼止應爲庶次子而不當授其嫡長之封該府朦朧奏請致將當涼誤封長子則

毋得借以爲詞兄反屈於其弟况鄒平王成化九年
奏選丁氏而弘治七年始敢請封遷延二十餘年情
弊昭然可見合將當渙承襲王爵革去當涼丁氏之
封題奉 欽依當渙當涼倫序事情鎮巡內外等官
既查勘明白你每又會議停當當渙准襲王爵當涼
革去長子封號欽此後當涼奏辯該都察院覆請
勅差司禮監太監賴義刑部左侍郎黃珂錦衣衛都
指揮陸宣前去同彼處鎮巡等官勘得當渙當涼俱
係鄒平王庶子而當渙倫序居長應該承襲王爵本
院覆題節奉 欽依這前後事情既查勘明白原封

丁氏金冊差官齎繳當涼累疏強辯有違 祖訓着
戴頭巾習禮三年魯王輒爲轉奏請封也當究姑從
寬革祿米兩箇月欽此又該本部覆題節奉 欽依
當渙准照前旨襲封王爵當涼已有旨了他男健柯
准封輔國將軍這起事情勘議明白處置停當還寫
書與各王府通行知會欽此嘉靖十四年又該本部
題奉 欽依將觀熾封爲長孫聽繼王爵今當渙灋
逝伊男健檔病故例該嫡孫觀熾襲封再難別議蓋
此事始末如此爲照襲王封爵 朝廷重典本部一
遵 累朝定制而行當渙事情先經親王勘報又經

廷臣會議又經 欽差內臣法司及在外撫按三司
重臣查勘明白 朝廷寫書與各王府知會又經題
奉 聖旨觀熾封爲長孫聽繼王爵已定臣等據有
成案方與覆題請封並不敢以一毫私意輕重其間
蓋當選應立已決於三十年之前非至今日而始定
觀熾乃承其本有之爵又何以財而行求徼柯明知
倫序不得稱嫡承襲伊祖母原封削奪已久輒敢故
違 明旨妄肆奏擾汚及大臣且既有奏詞即合聞
奏何乃先期貼向都察院門首必有主使之人以爲
他事不足以搖撼臣等惟是納賄宗室可深逞其毒

此往年將晉府新典襲封事誣害夏輔臣之故計也
今宗室此等事情甚多若一槩劾尤橫加污蔑將來
一應事務本部愈難定處欲避謗停寢則以刁難而
生怨欲據理題覆又以偏重而受誣事皆掣肘動必
招尤臣豈能一日安乎其於朝廷紀綱法度
不知視爲何物刁惡之風實不可長訪得該府已問
發充軍當京婚儀賈劉廷爵等一向潛住京師爲其
管幹爭擾無已伏望皇上俯賜昭察如蒙勅下
廠衛緝事衙門於五城地方緝拏健柯差來奏事人
犯劉廷爵王朝卿及本內詐稱家婆楊氏齎奏俱追

拏到官究問要見何人主謀擬寫本詞依律問擬發
遣至於爭襲事情若不重加勘議臣等何以自明伏
乞 勅下三法司堂上官吊查部院節年文卷從公
查勘備將始末情節開具上進 御覽便見應否何
人承襲本部有無徇私若果本部所據失當臣甘受
黜譴若徒柯肆辯不實亦乞重加罰治以正 國法
使宗室知所警憚而不敢瀆擾矣嘉靖十九年二月
二十一日奉

聖旨是觀熅倫序應襲祖爵先朝勘議明白處斷停
當徒柯累次爭襲又曾降勅戒諭乃敢故違成命妄

肆奏擾及又造捏虛詞誣讎大臣好生不遵 祖訓
劉廷爵王朝卿楊氏及該府在京潛住管幹的錦衣
衛便差的當官校緝拏送都察院三法司務要根究
主使教誘之人追問明白來說欽此續該都察院會
同具題本年四月二十一日奉

聖旨這事情既會問明白徧柯故違 祖訓謀奪王
爵捏詞奏擾煩瀆累朝節經降勅戒諭及會官奉旨
處斷恬不省改畏忌觀冷踵父所爲信用群小設謀
誣謗大臣都好生不遵朝廷法度徧柯本當重處姑
從寬革去祿米觀冷罰住俸米一年劉廷爵王朝卿

撥置宗室累犯不悛着押發極邊衛分永遠充軍其餘依擬

襄垣王第五子仕坏襲封緣由

該襄垣恭簡王第五子管理府事鎮國將軍仕坏奏爲再乞天恩請繼父爵以彰親親事奉 聖旨禮部看了來說欽此本部查得嘉靖十六年八月內該襄垣恭簡王第五子管理府事鎮國將軍仕坏奏稱伊父恭簡王係伊祖代簡王第五子蒙 太宗文皇帝始封郡王天順四年封建山西蒲州病故伊長兄仕壘襲封王爵與伊三兄仕聖四兄仕埭俱因荒淫無

度打死人命互相訐奏勅差皇親等官勘問是實俱革去封爵降爲庶人俱死及稱伊父恭簡王曾以孝行蒙恩獎勵夫以始封有德之父爲襲封不肖之累俾伊父生全之爵斬然而絕乞要比照岷府南渭王魯府樂陵王等事例子襲父爵等情奉 聖旨禮部知道欽此該本部覆題奉 聖旨這襲封事情你每還會官議了來說欽此本部會同吏部等衙門尚書等官許讚等議得襄垣恭簡王係 太祖高皇帝第十二子代簡王之第五子永樂二十二年始封襄垣王其長子仕壘承襲王爵後因與其弟第三子仕聖

第四子仕埭各犯罪革去爵職降爲庶人各子不許承襲其第五子仕坏先封鎮國將軍至弘治六年以倫序相應奉勅管理府事已經年久今要比照魯府樂陵王健概岷府南渭王彥瀆各奉欽依准襲事例雖於情理可據但查本部先年並無郡王長子已封王爵因事革去次子承襲事例其魯府樂陵王健概岷府南渭王彥瀆雖奉有 欽依准襲俱係一時特恩況仕坏既已奉勅管理府事亦足以世承恭簡王之祀所據仕坏奏要子承父爵臣等擅難比擬伏乞聖裁等因會題奉 聖旨你每既這等說着照舊

管理府事欽此又於嘉靖十七年內該仕坏復比例具奏請繼父爵等因奉 聖旨禮部看了來說欽此隨該禮科叅看得仕坏奏繼父爵前次奏請會議詳明夫何復爲瀆擾是使 朝廷政令不能信於一郡國也宜從查照施行等因該本部覆題前事已經奉有 欽依着照舊管理府事今又奏乞請繼父爵誠如該科所叅 臣等不敢依違具奏等因題奉 聖旨是欽此今又具奏前因查得本部收貯 玉牒冊內遼簡王第二子貴烺已襲王爵後與其第三子貴燮各犯罪革去爵職降爲庶人其第四子貴燮襲封遼

王通查到部臣等爲照 累朝事例郡王無嫡子者
許令庶子襲封絕嗣者其宗枝止許以本等官職奉
祀管理府事故先年岷府南渭王嫡長子膺鑑革爵
庶長子膺釵未襲病故膺釵所生嫡長子彥濱以孫
承祖爵其魯府樂陵王嫡第一子天亡第二子當河
已封長子革職第三子當漆未襲病故當漆所生嫡
長子健概亦以孫承祖爵但比郡王無嫡子者許令
庶子襲封事例素有 欽依准襲王爵今襄垣恭簡
王先年因長子仕壻已襲王爵與第三子仕聖第四
子仕埭俱各爲事革爵其鎮國將軍仕坏比時止以

倫序管理伊父恭簡王府事近見南渭王彥濱樂陵王健概各得襲封所以屢次奏比乞要子承父爵本部雖查得伊兄仕壇先以襲封王爵與南渭膺鑑樂陵當荷亦與襲封長子革職俱同但本部查無郡王長子已襲王爵因事革爵次子承襲事例節該本部會議具題節奉 聖旨着照舊管理府事去後仕坏復比前例具奏又經本部遵照前旨覆題外今仕坏又奏前因蓋襄垣恭簡王之有仕坏猶南渭王之有彥濱樂陵王之有健概也彥濱健概既得襲封而仕坏以恭簡王第五子管理府事則與郡王絕嗣者不

同所以累次陳奏不已原其情理亦屬有因但襲封
重典恩出 朝廷所擬仕坏應否准照彥濱健概事
例承襲父爵臣等不敢擅擬伏乞 聖裁嘉靖十七
年十二月三十日奉

聖旨既查有彥濱健概事例准照例襲封

查勘襄府代理府事事情

看得巡撫湖廣等處地方都察院右副都御史顧璘
巡按湖廣監察御史馮震各題稱藩國之政統于親
王若有事變則以郡王代理庶於體統不紊又必倫
序相當素行端謹者乃可服衆今襄王患疾已久又

無續生嫡庶之子府中一應事務委的缺人代理重復會勘得鎮寧王祐樞係襄王第三枝倫序相應承奉韓恕指摘有過究其所坐亦係誣奏微愆別無違犯鎮國將軍祐校係襄王第二枝陽山王親弟倫次雖稱相當緣非王爵似難攝行王事乞要查議上請於內簡命一位代理府事候陽山王長子襲封之日或襄王有子再議定奪一節爲照前項事情先該襄王具奏有疾本部覆題奉 欽依命陽山王祐楫代行禮儀并管理府事今祐楫病故所生一子尚幼難以代行又該襄王具奏本部覆題奉 欽依行彼處

撫按官查勘郡王中擇其倫序昭穆相當者定擬一位奏請定奪隨該承奉韓恕具奏欲將鎮國將軍祐稜代行本部併行撫按官查勘二年之上未見回報續該襄府左長史高仁等儀衛正陳守道等各奏稱鎮寧王祐孺一位讀書明理安重老成又與陽山王祐楫俱係襄王堂弟乞要早賜勅書暫爲代理等情該本部查照節年事例親王無嗣有病者俱以親枝郡王代理題奉 欽依行彼處撫按官查照先次題奉 欽依事理再行查勘於郡王中擇其倫序相應者定擬一位回報又經備行去後今又該巡撫右副

都御史顧璘巡按御史馮震具題襄王患病已久府中事務委的缺人代理查得鎮國將軍祐校雖係襄王第二枝陽山王親弟倫序雖稱相當緣非王爵似難攝行王事其鎮寧王祐孺係襄王第三枝倫序相當並無違礙乞要於內簡命一位代理回報前來本部查有親王無嗣患病俱以郡王代理事例合無請勅一道令鎮寧王祐孺暫行代理候陽山王長子厚頴襲封之日或襄王有子另行議處定奪本部未敢擅擬伏乞 聖裁嘉靖十六年九月十六日奉 聖旨是着鎮寧王祐孺暫行管理

覆勘襄府管理府事事情

看得欽差司禮監右監丞王憲刑科給事中馬汝彰
巡撫湖廣右副都御史顧璘各題稱襄王又疾無嗣
例該郡王一位代理府事先該撫按勘議明白該禮
部題奉 欽依着鎮寧王祐樞暫行管理奉有 勅
書欽遵已久止因承奉韓恕等利在立幼結構奏擾
欽蒙屢行查勘今行據守巡官會勘前來除將犯人
陸能等問招并將應參人員另行參究外查得鎮寧
王倫序及奏伊各項事情俱無違礙與節次撫按勘
議相同鎮寧王祐樞代理府事委屬相應再議照陽

山王長子厚頰倫序應該代理止緣年幼未曾襲封以故各該府衛守巡等官節次查勘未敢輕議舉保致使韓恕等執此爲詞屢行奏擾先該守巡官勘議待厚頰襲封之日即行具奏交代不必稱候襄王生有子息又啓疑端似亦議處明當但恐襲封之期尚遠不無愈起爭疑乞要曲爲宗藩息訟之慮度量時勢人情權爲計處襄王府事仍令鎮寧王暫行管理候陽山王長子厚頰十歲之上合無不拘常例早准請封令其代理鎮寧王即行交代等情一節爲照襄王有疾無嗣先代理府事陽山王祐楫薨逝雖有一

子厚頻年齒尚幼府事難以付托先該襄王具奏本部題奉 欽依行令彼處撫按等官累次勘議得鎮寧王祐樞應該代理已經本部題奉 欽依降勅着鎮寧王祐樞暫行管理外近節該承奉韓恕等假捏襄王宮妾何氏訐奏鎮寧王祐樞違礙事情該都察院題奉 欽依勅差司禮監右監丞王燾刑科給事中馬汝彰會同彼處撫按等官查勘去後今據勘報前來謂鎮寧王奉 勅暫理府事委屬相應止因承奉韓恕等意在立幼利已結構奏擾既經勘問罪狀已明別無再議所據奏要將陽山王長子厚頰待十

歲之上不拘常例早准請封令其代理以息爭端臣等查得宗室封爵郡王庶長子例該十五歲請封係累朝事例遵行已久今查厚頰係已薨陽山王庶出之子年方九歲襲封尚遠祖宗政令臣等擅難更易但各官所奏無非曲爲宗室息訟至意似應酌處合候命下本部移咨都察院轉行湖廣撫按等官令襄府長史司具啓奉勅暫理府事鎮寧王務要仰體聖明委託之重恪秉至公睦愛宗族凡有應奏事情照例具啓襄王轉奏毋得徇私招怨以負德意仍將陽山王庶長子厚頰加意撫恤勿令失所待

其年歲將近十五歲以前量爲早請行造冊封之日
鎮寧王即便奏辭交代今後本府宗室人等各要循
理守法如有仍前結搆奏擾者聽本部叅奏從重區
處如此庶府事有統國典不紊而爭端可息矣嘉靖
十八年正月二十八日奉

聖旨這事累經勘問奏擾不已厚頰既倫序應該襲
封況年已十歲只着伊母保護內外輔導等官協理
府事待年長及例徑自請封鎮寧王祐孺不必代理
致生事端原勅繳來

韓府隴西王違例請繼

看得韓王奏稱隴西王旭林見年五十五歲乏嗣承繼乞要將伊嫡生第二子謨墊過府與隴西王承繼一節爲照郡王乏嗣薨故之後方許昭穆相應之人承嗣不許奏乞繼嗣名目此係著例遵行已久今隴西王旭林年未六十無故請人之子爲後韓王不察輒以第二子過繼於人且倫序不應又稱過府已經三載私擅授受違例請乞顯有他日黃綠冒爵之圖揆之國典事屬有違叅照韓府長史并隴西王府教授各職輔導明知違例不能諫阻以致妄行奏擾應合有罪合候命下本部移咨都察院轉行巡按陝西

監察御史將韓府及隴西王府各輔導官員行提到官問擬如律以警將來嘉靖二十年九月二十九日奉

聖旨是

荆府永新王子女請封事情

看得荆府永新王厚熜奏稱正德十四年選得附籍蘄州民革任知縣黃佐女黃氏候奏請成婚間遇寧賊作亂母妃劉氏權與黃氏婚配生有子女六人俱年長成乞要將黃氏賜給封號及將所生子女一體賜給名封一節爲照各王府選婚例該各府具奏本

部題准選擇本土人氏結勘無礙候本部奏請方許
成婚若不係本土人氏及不候奏請擅自成婚者俱
該革退另選今荆府永新王厚燠先年選到蘄州附
籍原籍四川潼川州中江縣革任黃梅縣知縣黃佐
女黃氏既不係本土人氏又行擅自成婚先該伊母
荆和王妃劉氏并伊兄荆王與伊認罪陳情具奏請
封本部看係革前成婚生有子女查叅題奉 欽依
黃氏姑免革退所生子女不許請名請封節該荆王
代爲援例陳乞俱經本部遵照前旨立案外今又該
永新王厚燠以所生子女六人各年長成俱在怨曠

又具奏認罪乞要比照事例請封及辭爵分封子女
情詞懇切似非得已但辭爵分封子女本部查無事
例及違例擅自成婚雖查有唐府鎮國將軍彌環等
准封事例亦俱係一時特恩況黃氏既經奉有前
項欽依難以比擬但黃氏既免革退其所生子女
六人俱已長成若不與之區處終難杜其奏擾亦似
非古者罪人不孥之意合無俯念宗室將所生子女
姑與請給名封惟復仍照前奉明旨施行嘉靖十
六年八月二十一日奉
聖旨准他封

秦府永壽王下爭襲事情具題行勘

儀制清吏司案呈奉本部送內府抄出秦王惟焯奏據永壽莊僖王次妃龍氏啓切照臣妾男永壽王秉樞並無嫡出之子先年將男庶長子惟燿奏准在本府西書堂住居以便後嗣其惟燿病故見有嫡長子懷璿係臣妾男嫡長親孫今男病故例應承襲王爵累男第二子惟煒計舉惟燿生母張氏係侍校之女不應承襲又男第六子惟熹自稱妃生之子意要承襲看得伊母邵氏生子在前既報庶出封妃在後難改爲嫡若不具啓切思惟煒等各執偏見謀奪王爵

伏望轉奏 皇上將懷善應襲王爵照例請封又據永壽王妃邵氏啓爲懇乞天恩襲封王爵以正名分事有臣妾夫永壽王秉樞因前妃湯氏病故無出家廟缺人奉奠官眷無人管束又見 祖訓開載郡王庶子原無襲封之文弘治十八年四月二十日禮部題准郡王庶子不得襲封有夫恐失傳爵以禮娶臣妾入府爲繼妻准爲內助管理家事又奏蒙 天恩進封爲妃不勝榮幸臣妾有生二子其長惟熈蒙賜封鎮國將軍其次惟燾尚幼不幸夫王於本年十月二十九日病故自思臣切係永壽王妻到繼妻奏蒙

欽依進封爲妃實奉奠家廟管束官眷之人旣蒙
賜封妃號所生之子惟熹即係嫡長兄臣妾父邵璋
係西安後衛籍由舉人任登州府通判因盡忠身歿
贈本府知府其惟燿係夫妻媵張氏庶出兄張氏又
係本府校丁張秀之女各奏前因案呈到部看得秦
王奏稱永壽王秉樞於嘉靖十七年十月二十九日
病故並無嫡出之子庶長惟燿存日受封鎮國將軍
故夫人盧氏嫡生長子懷璿係永壽王嫡長男孫已
令主喪倫序應該承襲祖爵今永壽王庶第二子惟
燿庶第六子惟熹母邵氏紛紛啓擾乞要正倫理定

承襲以息爭端一節爲照郡王無嫡子者許令庶子襲封又正妃病故無出但有庶子止許選娶一人爲內助不授繼妃之封若續有所生亦爲庶子不得稱嫡承襲係是累朝定制今永壽王病故位下無嫡出之子本部行該宗人府備查玉牒倫序應該伊已故庶長子鎮國將軍惟燿嫡長子懷璿襲封但永壽王庶第二子惟煒許舉懷璿伊父惟燿生母張氏係侍校之女不應承襲庶第六子惟熈伊母邵氏原係內助進封爲妃又稱惟熈係伊所生即係嫡長各行爭襲本部難以定擬合候 命下本部移咨都察院行

陝西撫按衙門轉行秦府長史司具啓秦王知會應
該何人承襲明白具奏前來以憑題請定奪嘉靖十
九年二月初九日奉

聖旨是

永壽襲封事情勘報覆題

該巡撫陝西等處地方都察院右副都御史趙廷瑞
巡按御史張光祖各會題據該府長史司啓奉秦王
令旨懷塏故父惟燿雖稱妾媵所出居長惟憶雖稱
妃生即係庶出臣等議照永壽恭和王位下原無嫡
出之子其生前未曾立有長子長孫正名是以身歿

之後懷壻惟煒惟熿人執一詞紛競陳乞係于王爵
事體重大不敢擅議乞要仰候 聖裁一節爲照永
壽恭和王秉櫨於嘉靖十七年病故該伊庶長男已
故鎮國將軍惟燿嫡長男懷壻以伊父惟燿居長乞
以長襲庶第二子鎮國將軍惟煒以惟燿生母張氏
係本府侍校所生之女懷壻亦未授封長孫又以邵
氏雖妃生子惟熿在前並無嫡生字樣俱不應承襲
乞以惟煒襲庶第六子鎮國將軍惟熿生母邵氏以
伊係繼妻准封內助進封爲妃伊子惟熿即係嫡出
乞以嫡襲各相爭乞該秦王具奏前來本部擅難定

擬已經題奉欽依備行彼處撫按衙門查勘應該何人承襲明白具奏定奪今撫按官員趙廷瑞等具題前因臣等查得舊例郡王病故無嫡子者許令庶子襲封及正王妃無出病故生有庶子止許選娶內助不授繼妃之封所生之子不得稱嫡今永壽恭和王秉櫜病故原無嫡出遺下王爵除惟煒係庶次之子例難干預外所據已故庶長男惟燿嫡生長男懷璿查照玉牒應該承襲但該惟煒許舉惟燿係本府侍校之女所生臣等查得弘治十六年本部題奉孝宗皇帝聖旨各王府子女不許於本府軍校之家選

配是以惟煒訐奏及看得邵氏以伊進封爲妃伊子
惟熿稱嫡承襲臣等查得嘉靖十七年該秦王奏稱
永壽王內助邵氏生有子其乞要照例進封爲妃該
本部覆題奉 聖旨邵氏進封爲妃是以邵氏因
有妃號遂稱惟熿爲嫡承襲據彼處撫按官員回稱
人執一詞訖無定說臣等看得若據庶長則懷墻應
該承襲若以妃生則邵氏所生惟熿稱嫡似亦有因
但封爵重典臣等擅難定擬 恩命出自朝廷伏乞
聖明裁奪嘉靖二十年二月二十七日奉
聖旨邵氏已受妃封准伊子惟熿襲封王爵

南宮奏議卷第十九

南宮奏議卷第二十目錄

學校

增孔顏孟三氏子孫教授司廩米

授宗聖曾子裔孫皆質粹爲博士

定設金山衛學廩額

雲南馬龍州等處建設儒學

貴州普定等衛學定設廩額

湖廣鄖陽府鄖縣復議建學

貴州婺川縣建立儒學

廣西隆安縣學准設教官一員

酌處提學官以便巡歷

請禁私剏書院

教胄

議處國學事宜

公侯伯等爵及應襲子弟送監讀書

南宮奏議卷第二十

鈐山堂集六十

學校

增孔顏孟三氏子孫教授司廩米

該巡撫山東右僉都御史李中題議照孔顏孟三氏子孫乃大聖大賢苗裔故我 國朝累加崇重之典洪武二年特設教授司正統九年許就科目成化元年增定歲貢嘉靖九年 皇上俞撫臣之議准照州學例設廩增各三十名貢亦如之其制漸以備矣所未備者廩米耳蓋廩以養士其他郡邑生員皆然而三氏子孫既有廩膳之名未有廩米之實豈有所靳

於此哉特偶未之講耳今生員孔公戡等具呈前來而該司與提學道會議明白相應議處如蒙乞勅該部再加查議上請定奪施行等因奉 聖旨該部知道欽此看得都御史李中題稱孔顏孟三氏子孫教授司乞照他郡邑廩膳生員事例議添廩米以便肄業一節爲照孔顏孟三氏子孫我 朝特許另設教授司以作養之及許就科貢以臻向用嘉靖九年皇上又准照州學例設廩增各三十名規制已備但各府州縣俱有廩米養膳生徒而三氏教授司未經議給委爲闕典既該彼處巡撫官查議具題前來相

應依擬合候命下本部移咨都察院轉行山東撫按
官將三氏教授司廩膳生員查照原議兗州府所屬
通融處給廩米以助養贍庶各生肄業有資 朝廷
所以優遇之典無遺矣嘉靖十九年十二月二十八
日奉
聖旨是

授宗聖曾子裔孫曾質粹爲博士

該巡按江西監察御史陳襄據吉安府永豐縣民曾
質粹狀告爲嗣守先賢墳廟事查得嘉靖十四年四
月內該本部看得吏部左侍郎兼翰林院學士顧鼎

臣奏稱顏孟二氏各得世襲翰林院博士一員以承祀事惟曾子之後不霑一命之榮一節爲照曾子親受一貫爲聖門之高弟獨聞大學得吾道之正傳垂世立教與顏子孟子同功謚號宗聖已並追崇然獨世嗣弗傳祀墓失守雖配聖有靈而象賢無主誠爲闕典本官欲追求其後同於二氏子孫以作賓王家以主祀事實足以仰承 朝廷崇儒重道之盛心也但歷世久遠譜牒無傳若非精訪博求難免無僞冒之弊今去曾子之世上下千有餘年中間更歷變故子孫播越流寓豈無散而之四方者如南豐曾氏輩

肇布兄弟並顯於宋其家乘以爲出自曾子之後今其嫡派子孫亦不知誰何合無仍行天下南北直隸十三布政司撫按衙門一體訪求務得其人具實聞奏但不許輕易起送前來以啓夤緣爭訟之端臣等竊惟聖賢之後神明所扶必得真流芳胤以承大賢之澤以應 聖天子之所敷求者矣等因覆題奉

聖旨是欽此到部看得江西布政司咨呈該提學副使徐階親詣永豐縣審據曾質粹送到譜結查得曾子十五代孫曾據不仕新莽遷居廬陵吉陽生子曾闡曾賜闡居吉陽賜徙處州闡後十一代曾永生子

曾珪曾舊曾略珪仍居吉陽舊徙雲蓋略徙撫州曾
珪傳至曾孫慶生子曾偉曾駢偉生輝輝生後十二
代孫曾晞顏晞顏生子曾雷順曾德裕曾巽申德裕
曾孫榮爲學士上距曾子五十四代駢生曾耀耀傳
二十代即今曾質粹父曾奮用上距曾子共五十九
代查看曾氏自遷江南而言居永豐者爲嫡徙處州
雲蓋樂安者爲支自永豐一派而言出輝之後者爲
嫡出曾耀之後者爲支輝後見有永豐縣廩膳生員
曾高曾袞各文行脩飭若應勘合之求則合立嫡之
法但曾高兄弟回稱生長南方不樂北徙惟質粹往

來齊魯欣然肯行又結稱曾賢粹譜系源流真正明白原係合族推舉讀書循理委無別項違碍應合起送承守宗聖祀事一節爲照曾子學躋聖亞道本心傳三省功勤一貫妙悟立教當時有功後世歷稽前代具有追崇至我國 朝追謚宗聖加封郕國四配同享于孔子廟庭但顏孟子孫已蒙甄錄之典顧曾子後裔未霑一命之榮先該掌詹事府事今輔臣顧鼎臣上請乞要詳訪其後該本部覆題廣行咨訪今據江西布政司咨呈前來臣等看得曾氏子孫在逆莽之時避難南徙居于吉安而永豐爲嫡數傳至偉

而曾輝爲正但曾輝之後見今有曾高曾袞兄弟二人皆文行脩飭各稱生長南方不欲北遷則曾耀之後唯曾質粹讀書循理又該彼處提學官勘查譜系明白鄉族共推既無別項違碍情由起送前來所據宗聖曾子之祀應合曾質粹繼承查有顏孟世襲事例相應一體授以博士之職以彰我皇上重道崇儒之意興滅繼絕之仁其於教化非小補矣但恩命出自朝廷臣等未敢擅便伏乞 聖明裁處嘉靖十八年二月初八日奉

聖旨曾質粹既勘係先儒曾子之後准照顏孟二氏

例授翰林院五經博士仍與世襲

定設金山衛學廩額

該巡撫應天等府地方右副都御史夏邦謨等題據金山衛儒學生貢陸中美等呈稱本學建自正統至成化年間始得兩年一貢與縣學同初照邊方衛學未經設廩每遇貢期或論入學年深或論科舉次數致多爭較貢序混淆事無定體士靡顧藉乞爲查照平海衛學實廩事例定其貢額庶使人知向上士杜爭端深爲便益等因奉 聖旨該部知道欽此看得巡撫應天等府地方右副都御史夏邦謨巡按直隸

監察御史舒汀會題稱直隸惟金山一衛設有儒學屬松江府提調乞要查照福建平海衛事例將優等生貢二十名列爲廩膳每名月給廩糧一石分派上海華亭二縣出辦以奮勵士心一節爲照學校儲才給之餼廩此國朝造士之盛典邊方衛學以錢糧無可措處故特缺之非有所分別也今直隸止有金山衛一學既屬有司提調比與各邊衛學校數多難給者委有不同既該撫按官查與福建平海衛設廩事例相同會題前來相應依擬合候命下本部移咨都察院轉行彼處撫按衙門并提學官將該衛原考

優等生貢二十名照例定爲廩膳查照原議行令松江府所屬華亭上海二縣處給糧米以助廩餼庶生徒肄業有資而朝廷養士之恩亦溥矣嘉靖二十一年閏五月二十七日奉

聖旨准與廩膳二十名

雲南馬龍州等處建設儒學

該欽差巡撫雲南等處地方都察院右僉都御史劉渠等題據雲南按察司按察使程旦提督學校副使蔡雲程議得雲南所屬學校遺缺尚多其他偏僻地方猶有可諉若馬龍州祿豐縣正係一省通衢觀望

所係向未建學委非事體即今馬龍州生貢寄尋甸府學祿豐縣生貢寄安寧州學各相距二百餘里往來奔走殊爲不便且各州縣士民願備財費鳩工建立又非勞民傷財者可比所據各呈稱建學如蒙乞勅該部查議覆請 聖裁行臣等將馬龍州祿豐縣各建一學仍乞勅下所司將六涼衛學與前項州縣學各銓選學行教官一貢給與印記前來教理庶遐方文教以漸脩舉等因奉 聖旨該部知道欽此看得巡撫雲南地方右僉都御史劉渠巡按雲南監察御史包節各題稱馬龍州生貢寄尋甸府學祿豐縣

生員寄安寧州學各相距二百餘里往來不便且一
省通衢觀望所係向未建學誠爲缺典州縣士民願
備財費鳩工各建一學及六涼衛學已經建立完備
乞要一併銓官降給印記一節爲照學校廼賢士所
關文物攸萃雲南先以荒服僻遠未徧建學邇年以
來 聖化漸被文教四訖雖山澤溪洞之人無不知
讀書嚮用前項州縣既稱通衢務學必多而使遠寄
別學道里隔越不無阻絕未便既該彼處撫按等官
勘議各建一學及與已經建學六涼衛一併銓官給
印會題前來相應依擬合候命下本部移咨都察院

轉行雲南撫按衙門備行該司府將馬龍州祿豐縣照依原擬事宜各建立儒學一所并先建完六涼衛學俱從宜通融撥給齋膳夫役俸廩等項衛學照依虛廩事例仍咨吏部各銓選教官一員給憑令其到任誨訓生徒本部鑄造馬龍州祿豐縣儒學記各一顆六涼衛儒學印一顆給發前去用使其各該寄學生員令行提學官盡數掣回各學肄業原係廩膳應回六涼衛者改作優等名色與各州縣廩增名額起貢等項俱各照例施行嘉靖二十一年九月二十四

日奉

聖旨依擬

貴州普定等衛學定設廩額

該巡撫貴州等處地方兼理軍務都察院右副都御史劉彭年題據按察司按察使胡松提學副使蔣信議照清平普定等十三衛儒學生貢項恩等呈稱各衛自設儒學以來叨蒙作養舉貢不乏雖名衛學其實與貴州宣尉司程番都勻等府軍民並育事體相同但設廩之制止於一司八府一州其各衛生貢乃獨未霑斗粟似爲作養未均乞要比照湖廣偏橋等衛開設廩糧等因奉 聖旨該部知道欽此臣等看

得巡撫貴州等處地方右副都御史劉彭年巡按貴州監察御史趙大佑會題稱貴州普定等十三衛儒學生貢先年各衛地方貧薄錢糧減少未曾議給廩糧近來人才漸盛乞要比照湖廣偏橋衛學事例每學設廩二十名先量行月支廩米四斗普定安莊清平畢節四衛於各衛倉支給興隆赤水二衛於附近黃平白撒二所倉支給威清平壩安南烏撒龍里新添平越七衛造冊於布政司折糧銀內關支回衛給散候倉糧充裕照例與各府州縣儒學一體支給一節爲照學校儲才給之廩餼此 國朝造士之盛典

也今普定等十三衛學優等生貢月支銀米既該撫按等官議處停當及查與湖廣偏橋衛設廩事例相同相應依擬合候命下本部移咨都察院轉行彼處撫按衙門并提學官將各衛原考優等生貢二十名再加考定照例列爲廩膳行令各該衙門通融處給銀米查照原議給散以充廩餼候各倉糧充裕照依各該儒學事例一體支給庶稱朝廷養士之意嘉靖二十一年十一月二十五日奉
聖旨是

湖廣鄖陽府鄖縣復議建學

看得巡撫湖廣右副都御史顧璘提督撫治鄖陽地方右僉都御史路迎各題稱鄖陽府鄖縣先年創設府治人才未廣故將縣學停建今風氣漸盛人才輩出況其學基條記俱存乞要興復添選教諭訓導各一員領印管事一節爲照天下府州縣俱各建立學校所以作養人才先年鄖縣創設府治人才尚少以故議將縣學停建即今府學生員既有一百七十餘人視昔加倍似堪另建縣學既該都御史顧璘路迎會同巡按御史楊宜議題前來相應准擬合候命下移咨都察院轉行湖廣撫按衙門備行該府縣動支

無碍官錢脩復縣學并撥僉吏典齋膳夫役仍移咨吏部銓選教官給憑令其到任訓誨生徒其學記見存不必更鑄合行就彼交收用使其見在府學生員行令提學等官量爲分派府縣學肄業廩增名額及起貢等項俱各照例施行嘉靖十七年六月二十一日奉

聖旨依擬

貴州婺川縣建立儒學

該巡按貴州監察御史倪嵩呈稱會同貴州布按二司守巡提學等官體勘得安順州與普定衛同居一

城印江縣從思南府學相去不遠俱應照舊其婺川縣比年以來人才漸盛離府二百餘里士子從學不便查有舊縣基址可爲學基脩建木植師生俸糧等項該縣足敷支用乞要查議建立學校聯設師儒作養人才以廣聖化一節爲照天下建立學校以作養人才必使便於肄業乃能責其有成況于邊鄙化導轉移尤當加意婺川縣本黔南古邑僻處遐方先因人才移少未嘗建學邇者 聖明御極文教誕敷該縣士子嚮風迭出視昔爲盛遠就府學無以居業樂群揆之事體誠爲不便既先該都給事中田秋建議

本部題行查勘今又該巡按御史倪嵩會同布按二
司守巡提學等官重覆勘明回稱該縣委可建學錢
糧支費查有舊遺物料工可易成民皆樂助事關教
化相應准議合候命下本部移咨都察院轉行貴州
撫按衙門備行該司府縣照依擬請事宜建立縣學
撥僉吏典齋膳夫役移咨吏部銓選教官一員給憑
令其到任訓誨生徒本部鑄造婺川縣儒學記一顆
給發前去用使其見在府學生員行令提學官掣回
該縣肄業廩增名額准依原議起貢等項俱各照例
施行嘉靖十九年六月二十日奉

聖旨准議行

廣西隆安縣學准設教官一員

該提督兩廣軍務兼巡撫都御史蔡經題要專設教官訓誨生徒一節看得廣西南寧府新設隆安縣先因學宮未建將生徒暫寄府學地里遼遠諸生憚於往返人情不便茲該彼處撫按題稱該縣儒學今已建完齋膳廩糧亦經編定所據選官鑄印相應准擬合候命下本部移咨吏部銓選教官一員給憑令其到任本部仍鑄造隆安縣儒學記一顆給發前去用使其暫寄府學生徒行令提學官掣回該學肄業廩

增准照新建縣學事例各設十名仍准其三年一貢
則學政有成而風化益廣矣嘉靖十九年十一月十
三日奉

聖旨都依擬行

酌處提學官以便巡歷

該巡撫大同地方贊理軍務都察院左僉都御史史
道題照得大同一鎮所屬府州縣衛所儒學雖隸山
西按察司提學官但其地孤懸朔漠之外計自山西
省城西歷代州又四十里出鴈關即係胡馬經行之
衝從來奉使人員率多不利經往以故督學之官數

十年不一就其地必至科舉之年方到代州通取考試一次以致各生踈於統束漫無馳策臣愚欲將大同提學比照遼東帶管事例改隸冀北道分巡官代理其事等因奉 聖旨該部知道欽此本部查得嘉靖十年十月內該遼東都司衛學生員徐潮等奏爲乞恩比例附近科舉事該本部看得遼東科舉生儒先附山東應試乃緣海道之便今海道久塞陸路遼遠德州左衛儒學本是山東地方而科舉反附順天事體人情通屬未便今後德州左衛儒學山東布政司應試遼東科舉生儒聽遼東巡按御史考送順天

府鄉試等因覆題奉 聖旨是依擬行欽此今該前
因臣等爲照大同乃北邊重鎮近因地方多故以致
督學之官少至其地考校弗時遂使人才無所造就
今既該本官具奏前因其於轉移化導之機不爲無
見況查有前項遼東事例相應准擬合候命下本部
移咨都察院轉行山西按察司提學官將大同所屬
府州縣衛所儒學生員俱聽冀北道分巡官帶管以
便督率肄業庶學政舉而邊方以寧矣嘉靖十六年
六月十八日奉

聖旨准擬

請禁私剞書院

該巡按直隸監察御史游居敬題爲戒飭陽倡道學
陰懷邪僻大臣以端士習以光聖化事臣竊見邇年
以來迂儒乖士率多倡爲新說別立門戶以誤後學
而世之學者亦多厭常喜新沽名趨異從而和之雖
其中多俊傑之士然迂濫之徒助成偏說信以爲是
遂至雷同標榜蕩然成風慕虛名而壞實行背先訓
而售空談臣見其倡之者則南京禮部尚書湛若水
是也若水之學蓋與先尚書王守仁並立爭長以鳴
于世王守仁之言良知蓋祖宋儒陸九淵尊德性之

說謂只用一良知便了更不須說行此其詞之偏姑
未暇論若水之言體認天理則又暗宗守仁之說變
其詞以號召喜名之士其實乃私附之也然王守仁
嘗因宸濠之變極力撐之以靖大難雖當時亦有他
議而其謀國之忠濟變之才定不可泯若若水者則
一迂腐之儒其才不足以濟用其學不足以達權聽
其言則是稽其行則大非也伏望 皇上洞察若水
偏諛之學濫鄙邪詐之行俯賜罷歸或致仕以示懲
創仍乞勅下禮部將近來王守仁及若水所私著之
書盡行黜遠唯遵我 朝明經取士諸經史傳註講

求正道以求致用不許妄生異同以沽虛名以垂聖制其有爲守仁若水所剗書院或令拆毀或令改別館以滅其名伏惟 聖明垂察斯道幸甚天下幸甚等因奉 聖旨吏禮二部看了來說欽此看得巡按直隸監察御史游居敬劾稱南京禮部尚書湛若水偏諛之學等情欲得俯賜罷歸或以禮致仕仍禁約先兵部尚書王守仁及若水所私著之書并毀改門人所剗爲書院戒治在學生徒遊逸一節除王守仁已經奉有欽依禁約外爲照尚書湛若水始自家食及官詞林素常潛心理學希迹古人迄今老猶不倦

究其學術操行未可盡非但自任南京祭酒以來一時生徒多從講授間有冒竊之輩近於附和標榜以致御史游居敬有此論列是蓋生徒之誤若水乃以是而深咎若水之罪似未免於責脩之過也緣本官心行臧否莫逃 聖明洞察之下近以考滿到京該吏部查奏本官年及七十之上例不引復奉有明旨着復職又近該本官奏乞休致 明旨不准休其去留進退出自宸斷臣等別難議擬再照本官所著書論中間窺測古人章旨容有意見不同措詞未當但原非詆毀之說况於經傳亦有發明無足過謫惟是

門人剗爲讀書房舍扁稱書院定於典刑有乖相應
議處合候命下移咨都察院轉行南北直隸提學御
史及各處提學官即查奏內所稱地方書院名額若
果得實不拘在城在鄉俱行改正扁爲地方社學仍
省諭各學校生徒自後專崇經史註傳以求正道不
許仍前附和則人有定守士習端而風化正矣嘉靖
十六年四月二十五日奉

聖旨湛若水已有旨了書院不奉明旨私自剗建本
當治罪且都不究着有司即便改毀以後但有私剗
的巡按御史指實叅奏近來陽倡道學陰懷邪僻之

人照前旨通行嚴加禁約不許踵襲以壞士習
教胄

議處國學事宜

該司經局洗馬管國子監司業事童承叙題一曰備
規制二曰明法守三曰慎出納四曰專訓教五曰隆
優恤六曰疏壅滯伏望 勅下該部議處施行等因
奉 聖旨該部看了來說欽此除專訓教一事移咨
吏部題覆外臣等謹將所奏事宜逐一開具議擬上
請 一備規制古者天子之學謂之辟雍今旋丘無
水樹侯無地非所以崇禮制明道化也臣請廟門外

橫鑿一池上建石橋三座以備壁水橋門之制臣又查得洪武二十三年令國子監闢射圃給弓矢臣惟朝聘饋食諸禮不合今制姑令免習其鄉射冠祭士相見禮皆切日用謹於講誦之暇躬率諸生月一再行但本監原未闢有射圃無從肄習乞勅該部委官相地估計興造 前件臣等謹按古者天子立辟雍行禮其水旋丘如璧以節觀者故曰辟雍禮曰諸侯貢士於天子試之於射宮故辟雍又爲大射行禮之處其弘規盛制誠有所當備者但今大工方殷一應修理事宜似難輕議其闢射圃一節今天下府州縣

學俱有射圃而國學獨無使諸生無所肄習委爲缺典合候命下本部行工部候大工畢日委官相地估計興造徑自題請施行 一明法守本監撥歷原有定序比來徼幸之徒或增減月日或欺隱壓曠或公行請謁撓亂國典除痛加懲戒外臣查得監志各堂舊有通知文簿登寫生貢甲貫月日事故以憑序撥近年此簿多不置立又查得監規生貢初犯紀錄集愆冊再犯決五下三犯決十下四犯發遣安置近年此法亦多不行二者既廢是法守不明也今後各堂仍置通知文簿明白登記聽臣等不時弔取對勘因

而考驗各官賢否其生員再有屢犯前弊者亦聽臣等照例舉奏 前件臣等看得生員進監既有定期撥歷宜有定序舊規各堂俱有通知文簿以憑序撥既該司業童承叙舉以爲言相應申明遵守其僥倖撥歷等項作弊事發自有本等律例治罪難用發遣安置之條 一慎出納本監錢糧各有主管近年加以科道等衙門監收註銷亦云密矣但今生徒衆多來去無常盈縮無定每月饌米悉憑各堂糧冊關支或有已出而復給者混冒之弊亦稽察之無術也至於膳銀麥豆銀椒油錢鈔派納不一時常遲延拖欠

生徒坐班日久未得支領及至解到補給人數未免
不齊比之倉糧尤難稽考再照本監額數膳夫一百
名俱順天保定永平河間四府僉替後因停止會饌
每名徵銀十兩解用又於數內改撥廟戶十名庫子
一名廵亡八名見在八十一名該銀八百一十兩先
年題准內除十分之一公用其餘七百二十九兩并
麥豆銀三百五十三兩共一千八十二兩均給坐班
生徒本監見在及陸續補支人數大約二千有奇以
一千有奇之銀均攤給散每人一月不過四分已爲
太少況各處拖欠數多徃往不足臣惟前銀既給生

徒即同會饌原額膳夫相應復舊合無將查出改撥
逃亡十九名仍行四府照數僉補徵銀一百九十兩
解監與同前銀轆補均放 前件臣等看得國學乃
首善之地風化所關而祭酒司業之官又專以教人
爲務若錢糧出納自有典簿等官管理但以生徒來
往不常盈縮靡定每月饌米關支中間不無已出復
給混冒之弊其膳銀等項又以解納不一給散無期
尤難稽察誠有如本官所論者今後該監放支一應
錢糧其經該人負如有仍襲前弊故違者聽堂上官
指名叅究治罪及照該監原設膳夫一百名後因停

止會饌改撥廟戶庫子一十一名其餘每名徵銀一
十兩作膳銀等項支用遵行已久今本官奏要仍復
舊額膳夫一百名徵銀解納其廟戶庫子行宛大二
縣另僉應役竊詳本監生徒數多縱使照舊徵納亦
是所分無幾而宛大二縣另僉廟戶庫子不免又增
勞費止宜照舊其逃亡及拖欠等項相應行令各府
照例僉補 一專訓教臣看得本監書籍闕略雖有
鏤板數十餘種率皆殘缺不完典籍似爲虛設師生
無所誦習臣請開列經史子籍書目選委本監官員
前赴南京及蘇浙等處收買其價值之費官爲措給

庶學官有掌故之實諸生有考業之資 前件臣等
查得先該監察御史徐九臯奏要將歷代藝文志書
目叅對今貯經籍凡有不備者並令搜採藏諸中秘
該本部覆題節奉 聖旨書籍充棟學者不用心亦
徒示虛名耳苟能以經書躬行力踐爲治有餘都罷
欽此大哉皇言真足以破一時之陋習示諸士以大
方者矣所據該監差官買書一節難以再議但成均
乃誦法之所學官有掌故之職若應置經籍缺而不
完相應行令該監聽令在京從宜收置完備仍敕諸
生仰遵 聖訓用心講學務期力踐躬行以臻實効

一隆優恤查得監規生員有患病無家小者許於養病房安養醫士於順天府處給弘治十四年本監題准工部造保安堂五間以濟監生疾病今年久事廢醫生止徵銀七兩解用而保安堂倒塌不修臣請於故址建堂五間醫生照舊於順天府醫學內選差精通術業二名供事五年之後考其勞効送赴太醫院食糧其一應藥貲聽於公用銀內支給臣又查得會典洪武十五年令監生病故者有司給棺具歸其喪弘治十五年又該祭酒謝鐸題准監生病故移文順天府給銀三兩以爲殯殮其脚力口糧仍行兵部

應付還鄉近年以來該府多折鈔貫實惠不敷臣請
自今行移順天府查照舊例如數支給 前件臣等
看得監生疾病無家小者於保安堂安養醫生於順
天府處給雖係舊規但年遠事廢房舍已久倒塌今
大工方殷不急事宜俱應停止况患病生徒又令移
處別室官撥醫士術業未必精通恐徒虛費錢糧亦
於人情不便但宜聽從其便自行請醫調治其有貧
難及無家小者監官時加存念量給藥餌如有病故
者照例移文順天府給銀三兩以爲殯殮兵部應付
口糧脚力還鄉或該監從宜措置津遣俱聽徑自施

行一疏壅滯查得各衙門歷事名缺及監生歷事
月日屢年更定不常景泰年間正歷一年三箇月寫
本一年長差三年天順年間生徒盈萬歷期頓減正
歷六箇月寫本八箇月長差一年六箇月成化年間
正歷十箇月寫本一年長差一年六箇月弘治年間
正歷寫本各一年長差二年正德年間正歷八箇月
寫本七箇月長差一年六箇月嘉靖六年禮部具題
惟以弘治年例爲則蓋弘治年間止是舉貢二途數
雖不齊大約有限故一年之歷二年之差可以爲常
成化正德各因開納人數壅塞其勢不得不減嘉靖

十年雖嘗暫准景泰年例而行緣選貢之時歲額多廢兼且開納未行在監不過一二百人其勢不得不增然皆非通行之常法也嘉靖十五年本監具呈禮部題准增缺減歷不過止復弘治之舊近奉恩詔減歷二次止減見在歷事月日又遇科舉之年各生多有稱病遷延以圖應試不肯實減作缺故先次止減一百餘人後次不過三四十人恩雖浩蕩尚未疏通即今本監坐班生徒已及二千各項短差依親通前挨撥又七八百人歲貢官生及舉人會試在邇入監復班者日多一日加以歲貢復舊先年停止者俱得

考補人數有增無減前者未通後者復集以有限之
缺待無窮之人及今不處將有數年而不得撥數十
年而不得選者合無今後撥歷於見行弘治年例之
外酌量弘治正德之例將正歷雜歷巡歷長差各再
減四月或三月其各衙門歷缺亦各不爲常例量爲
添註 前件臣等看得各衙門歷事監生名缺年月
屢年更定不常惟視在監生徒多寡以爲增減嘉靖
十五年本部題准正歷十二箇月雜歷出巡九箇月
長差一十八箇月爲照今次在監生徒幾三千人比
之嘉靖八九年間不啻十倍人數日增無減積壓壅

塞恐至數年不得入選者相應議處合無酌量先年事例各遞減三箇月正歷九箇月雜歷出巡六箇月長差一年三箇月已撥出正歷等項各照遞減候他日坐班生員稀少之時仍行再議停止庶見在者得以疏通而後來者亦無壅滯之患矣嘉靖十六年六月初四日奉聖旨是依擬

公侯伯等爵及應襲子弟送監讀書

該兵部咨該本部題國子監司業兼司經局校書王同祖奏內開一曰教世胄臣請自今公侯伯子弟年

十八以上者該部具名上請送監讀書習禮本監仍
每名選撥友伴監生二名與之講學相資薰陶規勸
每五日一赴監候諸生立班定友伴引至階下恭揖
而退侍立兩傍以觀揖讓周旋之節候堂儀畢赴廂
授書講習其有不率教者憑本監堂上官奏聞區處
三年之後學有成效者本監奏聞該部註記候異時
襲封之後有所委任據以甄別賢否等因奉 聖旨
該部知道欽此該本部查照節年事例議擬覆題勲
臣之家子孫得以承襲爵祿或遇蒙任使管理軍務
責任匪輕書曰若生子罔不在厥初生言立教之不

可不早也況公侯伯子弟出自膏粱素養富貴易生
驕惰苟非預養而善教之欲望其能不變於習而成
其德也難矣我國家慎重典禮凡將官子弟年幼
者送監讀書見諸洪武五年成化弘治年間節經舉
行皇上嘉靖元等年又因該部建白申明前例題
請凡公侯伯等爵無分已襲未襲已任未任年三十
以下十四以上通行查出開送本部轉送國子監行
祭酒司業將大學語孟諸書相兼點授令其在家講
讀仍每十日赴營觀操等因嘉靖八年十二月二十
二日題奏聖旨是都准照舊例行欽此已經通行

去後今本官奏要疏名上請送監備諸勸典無非脩
明禮教至意相應議處合候命下本部通行在京五
軍都督府及行南京兵部轉行南京五軍都督府將
見在公侯伯等爵及應襲子弟年十四以上三十以
下未任者通行查出備具年甲籍貫徑自開送禮部
類具姓名上請分送兩京國子監照依嘉靖八年題
准教法分撥習禮肄業等因題奉 聖旨是欽此欽
遵咨部送司隨准後軍都督等府經歷司手本開送
襄城伯李應臣等前來案呈到部理合疏名上請伏
候命下本部將各爵俱劄送國子監肄業行令本監

堂上官查照嘉靖八年題准事例教習務俾學有成效庶文武兼濟他日可備干城之用而不墜其先世閥閱之風矣其南京各爵候咨送至日本部徑行該部一體施行嘉靖十九年十二月二十一日奉聖旨是各爵准送國子監讀書觀禮着本監堂上官用心教習務有成效

南宮奏議卷第二十